

Dogri Evening (NSD)

11-09-2026

खबरां

1. कल्लै थमां शुरू होआ'रदे ब्रिक्स शिखर सम्मेलन लेई दुनिया भर दे नेता नमीं दिल्ली च इकट्ठे होए, प्रधानमंत्री नरेंद्र मोदी होरें इस दरान वैश्विक कल्याण आस्तै सकारात्मक चर्चा दी मेद जताई।
2. प्रधानमंत्री नरेंद्र मोदी होरें रूस दे राष्ट्रपति व्लादिमीर पुतिन हुंदे कन्नै अज्ज दपक्खी गल्लबात कीती।
3. राष्ट्री राजधानी ब्रिक्स बपार मंच दी शुरूआत, विदेश मंत्री डा. एस. जयशंकर होरें ब्रिक्स दे 20 बरें पूरे होने पर बददी वैश्विक अस्थिरता बश्कार मते लचीलेपन, टिकाऊपन ते सहयोग बढ़ाने आस्तै आखेआ।
4. अमरीका च 11 सितंबर दे आतंकी हमले दी 25मीं बरें गंड दे मौके भारत नै आतंकवाद खिलाफ अपने संकल्प गी फही दोहराया।
5. यू.एस ओपन टेनिस च पिछली बारी दी विजेता एरिना साबालेंका ते दुनिया दी दुई नंबर दी खडारन-एलिना राएबाकिना महिलाएं दे एकल खिताब आस्तै आमने-सामने होइन।

<><><><><><>

PM-BRICS

प्रधानमंत्री नरेंद्र मोदी होरें आखेआ ऐ जे पूरी दुनिया थमां नेता नमीं दिल्ली च 18में ब्रिक्स शिखर सम्मेलन आस्तै इकट्ठा होआ'रदे न जेड़ा गै कल्लै थमां शुरू होआ'रदा ऐ। अज्ज इक सोशल मीडिया पोस्ट च मोदी होरें विश्वास जताया जे इस शिखर सम्मेलन च वैश्विक कल्याण दे कन्नोकन्नी मार्गदर्शक धेइऐ सने केई मुद्दे पर सार्थक चर्चा होग। स्टाड़े संवाददाता नै जानकारी दिती ऐ जे भारत मंडपम च दो रोजा शिखर सम्मेलन च 11 उभरा'रदी ते बदारदी अर्थबवस्था हिस्सा लैडन जिंदे च ब्राजील, चीन, इजिप्ट, इथेपिया, इंडोनेशिया, भारत, ईरान, रूस, साउदी अरब, दक्खन अफ्रीका ते संयुक्त अरब अमीरात शामिल न। 2026 च भारती अध्यक्षता दा विशेषार ऐ Building for Resilience, Innovation, Cooperation and Sustainability यानि लचीलेपन, नमोपन, सहयोग ते टिकाऊपन

आस्तै निर्माण। इस शिखर सम्मेलन च रूस दे राष्ट्रपति व्लादिमीर पुतिन, चीन दे राष्ट्रपति Xi Jinping, दक्खन अफ्रीका दे राष्ट्रपति सिरिल रामाफोसा, मिस्र दे राष्ट्रपति अब्दुल फताह अस्सीसी, इंडोनेशिया दे राष्ट्रपति प्राबोवो सुबियांतो ते ईरान दे राष्ट्रपति मसूद पेजेशिकयन हिस्सा लैडन। अबू धाबी दे युवराज शेख खालेद-बिन-मोहम्मद-बिन-जायद-अल-नहयान ते इथियोपिया दे प्रधानमंत्री आबी अहमद अली बी सम्मेलन च हिस्सा लैडन।

<><><><><><>

Rev.-PM Putin Talks

प्रधानमंत्री नरेंद्र मोदी ते रूस दे राष्ट्रपति व्लादिमीर पुतिन होरें अज्ज सं'झां नमीं दिल्ली दे भारत मंडपम च दपक्खी गल्लबात कीती। दौनें नेताएं आपसी हितै आहले केई मुद्दे पर चर्चा कीती। बैठक दे दरान श्री मोदी होरें श्री पुतिन होरें'गी कवि-दार्शनिक तिरुवल्लुवर हुं'दे आसेआ रचित प्राचीन तमिल ग्रंथ तिरुक्कुरल दा रूसी अनुवाद भेंट कीता। एहदा प्रकाशन केंद्री शास्त्री तमिल संस्थान आसेआ कीता गेआ ऐ। श्री मोदी ते श्री पुतिन दौनें भारत मंडपम च स्थित इनोप्रोम प्रदर्शनी दा बी अवलोकन कीता। राष्ट्रपति पुतिन कल्लै थमां शुरू होने आहले ब्रिक्स शिखर सम्मेलन च हिस्सा लैने आस्तै अज्ज बडुलै नमीं दिल्ली पुज्जे। प्रधानमंत्री मोदी अज्ज सं'झां ईरान दे राष्ट्रपति मसूद पेजेशिकयन हुं'दे कन्नै गल्लबात करडन। पच्छिम एशिया दी मजूदा स्थिति गी दिक्खदे होई एहू बैठक महत्वपूर्ण ऐ। इलाकाई घटनाएं पर दौनें नेताएं आसेआ प्रमुख रूप कन्नै चर्चा कीते जाने दी संभावना ऐ। प्रधानमंत्री मोदी राजधानी च अपने कार्यक्रमें दे दरान संयुक्त राष्ट्र महासचिव एंटोनियो गुतेरेश हुं'दे कन्नै बी मलाटी करडन।

<><><><><><>

FM-Russian Dy PM

केंद्री खजाना मंत्री निर्मलात सीतारमण होर अज्ज रूस दे पैहले उप प्रधानमंत्री डेनिस मानतूरोव हुं'दे कन्नै नमीं दिल्ली च ब्रिक्स शिखर सम्मेलन दे पैहले मिलियां।

<><><><><><>

FM CBG BRICS

ब्रिक्स मुखलें दे खजाना मंत्रियों ते केंद्री बैंक गवर्नरें बपार दे इक तरफा लागू होने ते रपे-पैसे सरबन्धी नियमें जियां कराया, बगैरा कराए दा दायरे पर चिंता जाहिर कीती ऐ। उनें आखेआ जे ऐसा करने कन्नै बपार पर माझा असर पोंदा ऐ ते विश्व बपार संगठन दे नियमें दे स्थाबै नेई ऐ। सदस्य मुखलें इक संयुक्त बयान च एहू जानकारी ब्रिक्स मुखलें दे खजाना मंत्रिएं ते केंद्री बैंक दे गवर्नरें दी बैठक दे बाद दिती जेड़ी कल मुम्बई च होई ही।

<><><><><><>

BRICS- Majour Force

वैश्विक अर्थबवस्था च ब्रिक्स दे मजबूत ताकत दे तौर पर उभरने दे कन्नै स्थाड़े संवाददाता नै बदारदे आर्थिक ते बपारिक महत्व गी बड़े कोला दिखेआ। ब्रिक्स नै 11 तेज कन्नै विकसित होआ'रदी अर्थबवस्थाएं गी कन्नै आंदा ऐ। एहू वैश्विक आबादी दा 49.5 प्रतिशत वैश्विक सकल घरेलू उत्पादन जीडीपी दा 40 प्रतिशत ते वैश्विक बपार दा 26 प्रतिशत हिस्सा न। ब्रिक्स देश इक-दुए गी 1-1 ट्रिलियन डालर दी कीमत दे उत्पाद निर्यात करदे न जेड़ा गै उंदे संयुक्त वैश्विक निर्यात दा 18.8 प्रतिशत ऐ।

<><><><><><>

BRICS Bussiness Forum

विदेश मंत्री डॉ. एस. जयशंकर होरें आखेआ ऐ जे अज्ज हर मुखल दी आर्थिक रणनीति च आत्म निर्भरता ते संकट थमां उबरने दी समर्थ महत्वपूर्ण होई गई ऐ। कन्नै गै, मजबूत सैह्योग ते सांझेदारी दे राहें टिकाउ ते लगातार विकास गी बढ़ावा बी जरूरी ऐ। नमीं दिल्ली च अज्ज बड्डलै ब्रिक्स बपार मंच गी संबोधित करदे होई डॉ. जयशंकर होरें एहू गल्ल आखी। उ'नें गलाया जे ब्रिक्स च बक्ख-बक्ख पर इक-दुए दे पूरक संसाधन, बजार, समर्थ ते अनुभव आहली अर्थबवस्थाएं शामिल न। श्री जयशंकर होरें आखेआ जे एहू समूह सदस्य मुखलें गी अपने अनुभवें ते नीतियों दी तुलना करने, ठोस बवस्थाएं गी मजबूत करने ते नमें मौके तलाशने दा मंच प्रदान करदा ऐ। डॉ. एस. जयशंकर होरें आखेआ जे एहू ब'रा ब्रिक्स लेई इक महत्वपूर्ण उपलब्धि ऐ कीजे समूह संस्थागत सैह्योग दे 20 ब'रे पूरे करा करदा ऐ। डॉ. जयशंकर होरें आखेआ जे ब्रिक्स ने अपनी सदस्यता, मकसद ते सैह्योग दी बवस्था दे मामले च पिच्छले किश ब'रें च बड़ा विकास कीता ऐ। उ'नें आखेआ जे ब्रिक्स शिखर सम्मेलन ऐसे समें होआ करदा ऐ जिसलै वैश्विक राजनीतिक ते आर्थिक बवस्था च महत्वपूर्ण बदलाव आवा करदे न। मंच दे उद्घाटन सत्र च उद्योग ते बपार मंत्री पीयूष गोयल होरें ब्रिक्स मुखलें

गी अपनी आर्थिक शक्ति गी लोकें लेई रोजगार, संपदा ते समृद्धि च बदलने ताई किट्टे रलियै कम्म करने दा आह्वान कीता। उ'नें आखेआ जे ब्रिक्स देश, दुनिया दी अद्दी अबादी ते वैश्विक जीडीपी दा लगभग 40 फीसद हिस्सा न।

<><><><><><>

EAM-Brazilian FM

विदेशी मामलें दे मंत्री डा. एस जयशंकर होरें अज्ज अपने ब्राजील दे हमरूतबा माउरो वीएइरा हुंदा नमीं दिन्ली च सोआगत कीता। इक सोशल मीडिया पोस्ट च डा. जयशंकर होरें आखेआ जे दवें नेताएं दक्खी रिश्ते, बपार ते निवेश, रक्षा, उर्जा, राईबाई ते अंतरिक्ष दे खेत्तर च आपसी सहयोग बढ़ाने दे तरीकें पर चर्चा कीती। दवें नेताएं मौजूदा भू-राजनीतिक म्हाल बारै बी गल्लबात कीती। डा. जयशंकर होर उरूगुए दे विदेश मंत्री मारियो लूबेटकिन हुंदे कन्नै मिले। इक सोशल मीडिया पोस्ट च डा. जयशंकर होरें आखेआ जे उनें दवें बपार, संपर्क ते संस्कृति दे क्षेत्र च रिश्ते मजबूत करने बारै चर्चा कीती।

<><><><><><>

India-Terrorism

प्रधानमंत्री नरेन्द्र मोदी होरें आखेआ ऐ जे आतंकवाद दा खतरा लगातार बदला करदा ऐ पर भारत दा संकल्प एह्दे सबनें रूपें दे खलाफ मजबूती कन्नै कायम ऐ। अमरीका च 11 सितंबर दे आतंकवादी हमलें दी 25मीं ब'रेगंड पर सोशल मीडिया पोस्ट च श्री मोदी होरें आखेआ जे आतंकवाद ने दुनियाभरै च अनगिनत लोकें दी जान लैती ऐ। उ'नें आखेआ जे बन्ने पार आतंकवाद करी प्रभावत भारत दहाकें थमां एह्दे खलाफ लड़ाई च अग्रे रेहा ऐ। प्रधानमंत्री होरें हमलें दे पीड़ितें गी श्रद्धांजलि दित्ती ते उ'दे परोआरें दे प्रति इकजुटता व्यक्त कीती। उ'नें आखेआ जे भारत आतंकवाद दे खलाफ सबनें जतनें च कन्नै खड़ोते दा ऐ। श्री मोदी होरें 2014 च न्यूयॉर्क स्थित 9/11 स्मारक ते अजैबघरै दी अपनी जात्तरा दी झलकियां बी सांझी कीतीआं।

<><><><><><>

NET Answer Key

राष्ट्री परीक्षा एजेंसी NTA नै UGC NET जून 2026 दी अंग्रेजी, कॉमर्स ते समाज-शास्त्र दी परतिह होई दी परीक्षा दी शुरूआती उत्तर कूजी जारी करी दिती ऐ। मेदवार 13 सितम्बर तगर UGC NET दी आधिकारिक वेबसाईट पर उत्तर कूजी पर आपत्ति दर्ज कराई सकदे न। इनें त्रौनं विशे दा परतिह होए दे इस्तेहान आहले प्रश्न-पत्र च केंई सारी गलतिएं दी शकैत मगरा एह आयोजित कीती गेई ही। अंग्रेजी ते कॉमर्स दा इस्तेहान 9 सितम्बर गी जिसले कि समाज-शास्त्र दी परीक्षा कल होई।

<><><><><><>

India-HPV

भारत ने ह्यूमन पैपिलोमा वायरस - एचपीवी टीकाकरण दे 80 लक्ख टीकें दा महत्वपूर्ण आंकड़ा पार करी लैता ऐ। एह निवारक सेहत दिक्खभाल गी मजबूत करने ते एचपीवी संक्रमण ते एचपीवी कन्ने जुड़े दे कैंसर थमां सुरक्षा प्रदान करने दी दिशा च इक बड्डी गैहू ऐ। सेहत ते परोआर कल्याण मंत्रालय ने आखेआ ऐ जे एचपीवी टीकाकरण पैहल फरवरी 2026 च शुरू कीते गेदे राष्ट्री एचपीवी टीकाकरण अभियान दे तैहत कीती गेई ऐ। मंत्रालय ने आखेआ जे गुजरात, उत्तर प्रदेश, मध्य प्रदेश ते मिजोरम ने अपने तय लक्ष्यें दा सौ फीसद कवरेज हासल करी लैता ऐ, जिसलै के बिहार, आंध्र प्रदेश ते असम ने 90 फीसद दा आंकड़ा पार करी लैता ऐ। 22 लक्ख शा मती किशोरियें गी टीका लाइयै उत्तर प्रदेश च सबनें शा मती गिनतरी दर्ज कीती गेई ऐ। मंत्रालय ने दस्सेआ जे टीकाकरण आहले सबै सत्र चिकित्सा निगरानी च आयोजित कीते जंदे न। टीकाकरण दे बाद होने आहले दुर्लभ माड़े असर कन्ने निब्बड़ने लेई 24 घंटे दी बवस्था कीती गेई ऐ। अभियान दी निगरानी यू-विन डिजिटल प्लेटफॉर्म दे राहें कीती जा'रदी ऐ ते हुन बाकी दे योग्य लाभार्थियें तगर पुज्ज बनाने बक्खी ध्यान केंद्रित कीता जा'रदा ऐ। मंत्रालय ने दस्सेआ जे एह अभियान, माता-पिता दी सहमति कन्ने 14एं बरें दी कुड़िएं गी मुफ्त ते अपनी मर्जी कन्ने इक्के खुराक एचपीवी टीकाकरण प्रदान करदा ऐ। हर टीकाकरण भारत गी अपनी धीएं लेई इक सेहतमंद ते कैंसर मुक्त भविक्ख दे होर नेड़े आहनना करदा ऐ।

<><><><><><>

PM-Swami Vivekananda

प्रधानमंत्री नरेंद्र मोदी होरें स्वामी विवेकानंद हुंदे शिकागो दे वल्ड्स पार्लियामेंट आफ रिलिजन च अज्जै दे दिन बरे 1893 च दित्ते गेदे असरदार संबोधन गी चेता कीता। सोशल मीडिया पोस्ट च स्वामी विवेकानंद हुंदे भाषण गी सांझा करदे होई मोदी होरें आखेआ जे एहू संबोधन भारत दी सभ्यता सरबन्धी लोकाचार दी झलक दिंदा ऐ।

<><><><><><>

Bihar Flood Situation

बिहार च हाड़ दे हालात अजे बी गंभीर बने दे न। राज्य आपदा प्रबंधन विभाग दे मूजब 44 लक्ख श मते लोक 14 जिलें दे 85 ब्लाकंे च प्रभावित होए न। प्रभावित जिलें च राहत बचाव कम्म जारी ऐ। 1 ज्हार 46 सामुहिक रसोईघर स्थापित कीते गेदे न। दो लक्ख 50 ज्हार पालीथीन शीआं ते 41 ज्हार सुक्के राशन दे पैकेट लोकें गी बंडे गे न। बड्डी नहरें च पानी दा स्तर पिछले 24 घंटें च घटेआ ऐ, पर 8 नहरां अजें बी खतरे दे निशान दे उप्पर बगा'रदियां न।

<><><><><><>

US-Open

यू.एस ओपन टेनिस च पिछली बारी दी विजेता एरिना सबालेंका ते दुनिया दी दुए नंबर दी खडारन एलिना राएबाकिना बश्कार महिलाएं दे एकल मुकाबले दे खताब लेई मुकाबला होग। एलिना राएबाकिना नै चौथी वरीयता प्राप्त कोको गौफ गी 3-6, 6-4 ते 6-4 कन्नै दुए सेमीफाइनल च हराया जेड़ा न्यूयार्क च होआ हा।

<><><><><><>

Gadkari-One Tag

शिड़क, यातायात ते जरनैली शिड़कें सरबन्धी केंद्री मंत्री नितिन गडकरी होरें अज्ज मुबई च फास्टटैग आस्तै वन टैग फेसीलिटी दी शुरूआत कीती। एह्दे कन्नै गड्डिणं दे मालिक अपना फास्ट टैग राजमार्ग जात्तरा ऐप राएं नमें बैंक खातें कन्नै लिंक करी सकदे न। इस सेवा कन्नै गड्डिणं दे मालकें गी पैहले आले फास्ट टैग स्टिकर गी हटाना जां बदलना नेई पौग। कट्टु गी संबोधित करदे होई गडकरी होरें आखेआ जे सरकार दा धेइया ऐ जे इस वित्तीय बरे दे खत्म होने धोड़ी टोल प्लाजा पर कुसा गी बी 10 सक्के थमां मता इंतजार नेई करना पोऐ।

NR Train Ops

उत्तर रेलवे नै ट्रेनें दे कम्मकाज च अस्थाई बदलावें दी घोशणा कीती ऐ जेड़े अज्जै थमां लेइयै ऐतवार धोड़ी रौहंगन। इनें बदलावें दा कारण कम्मकाजी जरूरतां दस्सियां जारदियां न। इनें बदलावें दा असर किश सेवाएं पर पौग जेड़ियां बड्डे शैहरें ते लम्में पैडे दी रूटें पर उपलब्ध न।

<><><><><><>

Delhi Metro BRICS

दिल्ली मेट्रो नै जानकारी दिती ऐ जे ब्रिक्स शिखर सम्मेलन दे चलदे ट्रैफिक पाबंदिएं बश्कार मेट्रो सेवां ऐतवारें सारी लाइनें पर बड्डलै 6 बजे शुरू कीती जाग। दिल्ली मेट्रो नै पैहले जानकारी दिती ही जे सारे मेट्रो स्टेशन अगली सूनचा धोड़ी खुल्ले रौहङन।

<><><><><><>

Kashmir-Expo

बपार-कारोबार गी बढ़ावा देने सरबन्धी संगठन जे.के.टी.पी.ओ उद्योग ते बपार मैहकमे दे बैनर हेठ अज्जै थमां लेइये 13 सितंबर तगर कश्मीर एक्सपो 2026 दा आयोजन करा'रदा ऐ। इस बरे दा विशेषार ऐ कला-संस्कृति ते खान-पान दा जश्न मनांदे होई हुनर गी सशक्त बनाइयै कश्मीर दीसगोसार विरासत दा प्रदर्शन। इस एक्सपो दी शुरूआत अज्ज श्रीनगर च जबरवान पार्क च उपमुख्यमंत्री सुरेंद्र चौधरी हुंदे आसेआ कीती गई। इस आयोजन च कारीगरें, बुनकरें, उद्यमियें, कारोबारियें ते होर दुए मुतल्लका धड़ें गी किट्टे इक्कै मंच पर औने दा मौका थ्होग जेह्दे कन्नै उनेंगी जम्मू-कश्मीर दे बन-सबन्नें उत्पाद, हुनर, सांस्कृतिक विरासत ते होर दुइयां चीजां दस्सने दा मौका थ्होग।

<><><><><><>